

止觀輔行傳宏決
大方廣佛華嚴經音義



00784

Z₁₂₁

/

:0745

止觀輔行傳宏決

釋湛然述
胡澍錄

中華書局

叢書集成初編

止觀輔行傳宏決（及其他一種）

中華書局出版發行

（北京王府井大街三十六號）

秦皇島市資料印刷廠印刷
一九九一年北京第一版

開本：七八七乘一〇九二毫米三十二分之一
統一書號：ISBN 7-101-00894-1/K·367

止觀輔行傳宏決序

宗虛無者。名教之道廢。遺文字者。述作之義乖。古先梵皇。乘時利見。聖賢道契。德音莫違。尙假言詮。寄諸結集。況時淹像季。學鮮知幾。領會之賓。十無一二。至有窮年默坐。甘節于憊情。白首論心。遲回於半滿。人之多僻。其若是乎。未階捫象。各陳乳色。或謂卽心是佛。悟入之門。色不異空。本末誰迹。將冥絕待。章句何施。嗚呼。大教陵夷若是。蓋由未辨文字之性離。孰喻總持之功深。惟昔智者大師。降生示世。誕敷元德。大拯橫流。咨覆質於大思。振絕維於龍猛。命家作古。以中觀爲師宗。立極建言。以上乘爲歸趣。爰付灌頂。公引而伸之。欽若宏持。廣有記述。教門戶牖。自此重明。繼之以法華威。威公宿植。不愆于素。復次天宮威。威公敬承。如水傳器。授之於左谿元朗。朗公卓絕。天機獨斷。相沿說釋。追恤我文。載揚於毗壇。湛然。然公開生。總角穎悟。左谿深相器異。誓以傳燈。嘗言止觀二門。乃統萬行。圓頓之說。一以貫之。噫。續承四世。年將二百。魚魯斯訛。不無同異。方將釋思津。導元流。遂廣斥邪疑。旁薄今古。質而不野。博而不餽。著輔行記。凡十卷。備前聖廣略之旨。允今人勝劣之機。豈唯錯綜所聞。將以隱括所治。所治卽行。三多之妙。運邊階。所聞唯解。一真之元。覽斯溜。夫行有岐路。則始終天隔。解無方隅。亦淺深隨類。建言輔行。以舉其全。故自遠方來。詢疑請益。擊蒙發覆。孜孜日夕。庶幾幽贊。欽若傳宏。道之將行。不孤運矣。咨予末學。輕議上乘。其猶爝火。增輝二曜。君山除僮男普門子敬序。時永泰首元興唐八葉之四載。

輔行記題辭

乾隆間孫淵如觀察輯蒼頡篇。任幼植侍御輯字林。搜及釋藏。於是唐釋元應一切經音義。慧苑華嚴經音義。得顯於時。厥後元應書一刊於關中。再刊於粵東。慧苑書一刊於臧氏。再刊於徐氏。陳氏。流傳寔廣。獨釋湛然輔行記十卷。沈藶彼教。世少知者。武進臧氏雖亦嘗爲之掇錄。祇存其序於拜經堂文集。而迄未刊行。比與績溪胡君甘伯論及此書。甘伯言囊游浙江。曾借得南藏小字本。摘鈔一過。以寇警失去。深加惋惜。余謂方今都下所貯。明正統間北藏本。尙大半完好。盍復借錄之。甘伯欣然從事。竭十晝夜之力。纂成一冊。凡屬梵言。概從刪削。其有不援古籍。自抒己論者。亦多汰之。以歸省約。就中稱引遺文墜簡。藉存什一。所引見存各書。字句往往別異。或出唐以前舊本。均足以資考證。余嘉甘伯好古之勤。又喜是書之晦而復顯。爲付剞劂。冀與元應。慧苑兩家並廣其傳焉。其書舊題止觀輔行傳宏決。今從序文稱輔行記。而仍畱舊名。并存其原序原第。俾後人有可考。同治八年七月吳潘祖蔭。

止觀輔行傳宏決

第一之一

唐 毗陵沙門湛然述

清 續谿胡 樹錄

隋字玉篇加土者。待過反。字本無走。唐祚旣興。謂隋已走。是故加之。皇大也。爾雅云。皇者匡正也。極也大也。壯盛貌也。挹者斟酌也。詩云。惟北有斗。不可□挹酒漿。翦字謂派翦。亦分別。字書多作別字。論語云。生而知之者上。學而知之者次。困而學之又其次也。困而不學。民斯爲下矣。書云。青出於藍。而青於藍。染使然也。書云。峴竹未翦。則鳳音不彰。情性未鍊。則神明不發。詩云。有覺德行。鶯頭者。說文云。此鳥黑色多子。廢者。說文云。馬舍也。玉篇云。瞳者目珠子也。博物誌云。嵩高爲中岳。屬豫州。華山爲西岳。屬同州。泰山爲東岳。屬兗州。恆山爲北岳。屬冀州。衡山爲南岳。屬荊州。爾雅釋親云。父之考爲王父。加王者尊也。王父之考爲曾祖王父。加曾者重也。曾祖王父之考爲高祖王父。加高者最上也。卽者廣雅云。合也。天台者。章安山記云。本稱南岳。周靈王太子晉居之。魂爲其神。命左右公改爲天台山也。若准孫公山賦云。所以不列於五岳。闕載於常典者。以其所立幽奧。其路曠迴。故未知章安所出。第一之二

梯者。說文云。木階也。圓者全也。李奇云。圓錢也。玉篇云。無目曰瞽。又云。有瞳無眇。直忍切。曰瞽。有目無

瞽曰瞽。說文云。龍者。能幽能明。能大能小。春分登天。秋分潛淵。管子曰。欲小如蠶子。欲大滿天地。耳者。通度也。方言云。竟也。寧者。說文云。願辭也。亦豈也。淮南子云。海不讓水。積小成大。莊子云。生爲騷。死爲決。決。殯也。殯。字戶貫反。釋名云。疣者。丘也。出於皮上。如地有丘。論語云。導謂爲之正教也。說文云。月者。闕也。有盈有虧。故名爲闕。廣雅云。鏡。月扇月。詩云。彼都人士。出言有章。廣雅云。顛倒也。論語注云。顛沛。僂仆也。字統云。有底曰囊。無底曰囊。冠。首飾也。平聲呼之。周禮云。在首曰冠。亦可去聲。謂冠於首。云者。說文云。象雲氣在天迴轉之形。廣雅云。云者有也。

第一之三

爾雅云。一達名道路。二達名岐旁。三達曰劇旁。四達曰衢。五達曰康。六達曰莊。七達曰劇。八達曰崇。九達曰達。六畜者。鄭元注禮云。牛馬羊犬豕雞。爾雅云。四極遠者。東至秦。遠西至郿。國南至漢。盆北至祝栗。此極遠也。博物誌云。東九夷。南六蠻。西七戎。北八狄。次荒之國也。周禮八蠻六戎。餘同博物。有力鳥也。俗呼爲老鷄。爾雅云。鷄類也。老子曰。失道而後德。失德而後仁。失仁而後義。失義而後禮。失禮而後智。失智而後信。顯顯者。仰也。詩云。萬人顯顯。由者藉也。爾雅云。助也。符。合也。漢書封功臣。以竹長六寸分而合之爲信。故字從竹。玉篇云。劍者。裂也。俗釋權者。反常合道。又云。迹近而行遠。和光不同塵。賈逵曰。變也。宜也。

第一之四

西域記云。昔婆羅門以一竹杖。長一丈六。欲量佛身。纔約佛身。杖上猶有如杖量許。量既不已。插地而去。其杖成林。後於此中而立精舍。名爲杖林。史記云。識用曰神。易曰。利用出入之謂神。易曰。陰陽不測之謂神。釋名云。誓。制也。遯者。往疾也。詩云。人而無禮。胡不遯死。釋名云。神。盡曰死。耕者。說文云。犁也。蒼頡云。壘也。說文又云。人曰耕。牛曰犁。山海經云。后稷之孫叔均始造牛犁。說文云。土高曰臺。有木曰棚。說文云。由風所飛曰颺。由風動塵爲飈。

第一之五

玉篇云。加言曰誣。亦掩也。欺也。風俗通云。聖者聲也。以其聞聲知情。通天地暢萬物故也。易曰。聖人者。與天地合德。與日月合明。與四時合序。與鬼神合其吉凶。

第二之一

字書云。加趺者大坐也。禮云。在牀曰屍。在棺曰柩。論語曰。君子不可罔也。疲者。國語云。勞倦病也。蒼頡云。嬾也。

第二之二

列子有六夢。謂正夢。噩夢。思夢。寤夢。懼夢。周禮云。占六夢之吉凶。壇者。禮云。築土爲之。饌者。玉篇云。陳飲食也。亦具食也。韓康伯云。洗心曰齋。防患曰戒。東阿王問子華曰。君子亦有耘乎。子華曰。夫拔藝莠。養家苗者。農人之耘也。修正性。改惡行。君子之耘也。說文云。不耕曰場。詩云。九月築場圃。宵者。

說文云骨法相似也。爾雅云鬼者歸也。尸子曰古者名死人爲歸人。又云人神曰鬼。地神曰祇。天神曰靈。阮籍兄孫瞻每執無鬼論。忽有客詣之言及鬼神之事。客乃理屈。作色曰。鬼神者。古今聖賢共許。君何獨言無。卽僕是鬼也。遂變形而滅。又阮咸有從子修。亦執無鬼。有論者云。人死爲鬼。君何獨言無。曰。今有見鬼者。言著生時衣。若人有鬼。衣亦有鬼耶。論者伏焉。孔子云。生與人事。此尙未知。死與鬼神。我爲能測。詩傳云。以色曰妬。以行曰忌。害賢曰嫉。易曰。唯人爲萬物之靈。禮云。人者。天地之心。五行之端。丈夫者。人長一丈。故曰丈夫。白虎通曰。夫者扶也。以道扶接故也。爾雅云。蟲食苗節爲賊。

第二之三

國語云。陸載曰運。水載曰漕。莊周云。出處語默。爾雅云。白華。野菅也。郭璞云。茅屬。

第二之四

說文云。姪者私逸也。左傳云。貪色也。

第二之五

周是國號。姓姬氏。帝王世紀曰。帝嚳妃姜嫄。履神人之迹而孕。以爲□□棄之陋巷。牛羊不踐。置之寒冰。鳥覆翼之。嫄以爲神。收而養之。童齡好於稼穡。及長。仰伺房星。以爲農侯。舜進之於堯。以掌農正。而爲稷官。故謂之后稷。賜姓姬氏。始武終赧三十七王。頌曰。武成康昭穆恭懿孝夷厲宣幽攜平桓莊僖惠襄頃匡定簡靈景悼敬元貞哀思哲威安列顯順赧王三十七。攜不經□□云三十八。左傳云。初平王之東。

遷也。幸有過伊川。見被髮而祭於野者。曰。不及百年。此其戎乎。其禮先亡矣。犬戎者。卽六戎是。初名六
渾。今時其地置六渾縣。謂唐虞已上有犬戎。獫狁。薰鬻。居天之北邊。隨畜牧而轉移。逐水草而遷徙。無耕
田。有畜養。各有地分。而無文書。有言語約束。兒能乘羊。引弓射鳥。唯習弓箭。而無禮義。君王已下。皆食畜
肉。少者食肥。老者食其餘。貴少賤老。父死妻其母。兄死妻其嫂。自殷周以來。侵抄中國。後□□伐犬戎。逐
於洛北。時時入貢。名爲荒服。□□已後。犬戎不至。列傳云。阮籍字嗣宗。陳留尉氏人也。容貌魁傑。志氣
宏放。傲然獨得。任性不羈。喜怒不形於色。或閉戶讀書。累日不出。或□□山水。信宿忘歸。嗜酒能嘯。忽忘
形骸。時□□謂之癡。晉魏之世。天下故多名士。而□□者。因不交世事。酣飲爲常。及文帝輔正。拜爲東
平相。乘牛而往。旬日而還。雖性志孝。而不拘禮教。母終。正與人棋。對者求止。固留決賭。賭訖。飲酒二升。舉
聲一號。吐血數升。裴楷往弔。但踞醉直視而已。見禮俗之士。以白眼視之。由是禮俗之士。嫉之若讎。或時
輒臥鄰家少婦之側。或他有亡者。無親而往弔。罵□□路窮則哭還。宗集不復用杯。圍坐圍盆而口歡。
□□國號晉。姓司馬氏。高陽之子。黎爲夏官。□□以夏官爲司馬。因以爲姓。懷愍至。孝武來。一十五帝。
愍帝之時。晉國亡者。由諸賢達不習兵戈。尙文奢誕。後公卿子孫效之。遂爲五胡侵國。因幸江東。故童謠
云。五馬浮渡江。一馬化爲龍。因茲惠帝第三子。叡等。徙都建業。號爲東晉。稱元帝。至孝武時。仍多酒色。由
茲祚傾。阮籍兄子咸。咸次子孚。元帝時爲□□蓬頭飲酒。不以王務經懷。恆爲右司所□□容之。後拜
揚州長史。帝謂曰。卿鎮軍府。宜節飲也。對曰。陛下不以臣不才。委以軍旅之重。臣不敢有言者。以今王莅

作威風教赫然。皇澤遐被。寇賊息迹。氛祲既澄。日月明白。亦何可燭火不息。正應端拱嘯詠。以樂當年。炎帝神農氏爲黃帝所滅。子孫避之。居于朔野。鮮卑奉以爲主。其後曰普迴。因狩得鹽。普迴異之。以爲天授。其俗謂天曰宇。故曰宇文。初登之時。亦信佛法。後信讖緯云。黑衣當王。遂重道宗。親承符籙。元冠黃褐。內常服用。心忌釋宗。盡欲誅殄。而患信佛者多。未敢專制。有道士張寶詭詐罔上。私達其策。潛進李宗。排斥釋氏。元嵩相副。帝納其言。欲覘經過。貶量佛失。召僧入內。七宵行道。帝與同場。七宵無過。又勅司隸大夫甄鸞詳佛道二教。鸞上笑道論三卷三十六篇。用笑三十六部。其時又有安法師與帝情重。又著二教論十二篇。明道教攝在九流之內。不應獨爲教主。故教唯有二。遠法師有抗帝論。後帝東巡。任道林開佛法。又因王明上表。以開佛法。其元嵩本河東人。遠祖從宦家於蜀川。梁末都東城。卽後梁蕭察也。察滅歸立。至天保十二年。當陳太建六年。卽宇文建德三年。滅佛道二教。宇文經于七年。至天和二年。嵩上表云。唐虞之世。無佛圖而國安。齊梁有寺舍而祚滅。但利民益國。卽稱佛心。夫佛者。以大慈爲本。終不苦役黎民。虔恭泥木。請造平延大寺。容著四海萬姓。不勸立曲見。伽藍偏安二乘五典。平延寺者。無開道俗。罔擇冤親。以城隍爲塔寺。卽周武是如來。用郭邑作僧坊。和夫妻爲聖衆。推令德作三綱。尊者年爲上座。選仁智充執事。求勇略作法師。是以六合無怨紂之聲。八方有歌周之詠。飛沈安其巢穴。水陸任其長生。都上一十五事。莊子云。西施心痛而嘔其里。其里之醜人見而美之。亦歸捧心而嘔其里。其里富人見之。堅閉門不出。貧者見之。挈妻子而去之走。彼知美嘔。不知嘔之所以美。穴者深潛。飛者高逝。此之二句。在

莊子毛嬙麗姬文中。今文將此二句共成西施之文。彼注西施文云。夫禮義者。當時而用。則西施也。過時而不棄。卽鄰女也。夫三皇五帝之禮義法度。其猶狙獒橘柚。其味相反。而皆可口。故禮義法度者。須應時而用之。今取狙獒衣以周公之服。彼必齟齬挽裂。盡去之。觀古人與今。其猶狙獒之異周公。說苑云。人臣之行。有六正六邪。一者。萌兆未現。見存亡之機。名爲聖臣。二者。進善通道。功歸於君。名爲大臣。三者。卑身進賢。稱古行事。以勵主意。名爲忠臣。四者。明察早見。終無憂患。名爲智臣。六者。守文奉法。飲食廉節。名爲貞臣。六者。國家昏亂。而不儉犯主。嚴顏言主之過。身死國安。名爲直臣。

第三之一

莊子云。而世貴言傳。書不足貴也。老子曰。知則不言。言則不知。莊子云。人長七尺。不以爲大。螻蟻七寸。而得大名。

第三之二

說文云。未冠而死曰殤。禮云。十九已下曰長殤。十五已下曰中殤。十一已下爲下殤。七歲已下爲無服之殤。

私者。蒼頡云。不公也。

第三之三

莊子云。天其運乎。地其處乎。日月諍於所乎。孰主張是。孰綱維是。孰居無事而推行是。老計守雌。

第三之四

廣雅云。閏者正也。五行者。此起黃帝感元女星精說。此五行。白虎通曰。火者陽尊。水者陰卑。木者少陽。金者少陰。土者大包。故二陰三陽。尊者配天。水者唯也。任養萬物。木者觸也。觸動萬物。火者化也。謂變化萬物。金者禁也。禁其始起。土者吐也。含萬物也。六甲者。甲頭也。一甲五行。一行二日。六甲六十日。一年之中。甲經六市。行三十六。白虎通云。甲有十干。時有十二。甲者萬物之甲。如甲未開。乙者屈也。如萌蟠屈。未欲出也。丙者明也。謂萬物明也。丁者彊也。戊者盛也。己者起也。庚者更也。辛者始也。壬者任也。癸者戾也。子者慈也。丑者紐也。寅者演也。卯者茂也。辰者震也。巳者起也。午者長也。未者味也。申者身也。酉者收也。戌者滅也。亥者該也。陰陽者。太元經云。營大功用。萬物者。曰陽。幽無形不可測者。曰陰。易曰。一陰一陽之謂道。陰陽不測之謂神。八卦者。謂震兌。離坎。乾坤。艮巽。一卦六爻。爻謂適時之變。又爻者。效也。謂陰陽氣也。易曰。掛一以象。三十有八。變而成卦。五經者。白虎通曰。孔子見周道陵遲。自衛反魯。以定五經而行其道。禮記經解曰。溫柔敦厚。詩教也。疏通知遠。書教也。廣博易良。樂教也。潔淨精微。易教也。恭儉謙敬。禮教也。屬辭比事。春秋教也。禮有三。謂周禮。儀禮。禮記。傳有三。謂公羊。穀梁。左傳。故云九經。子謂百家諸子。史謂諸國史籍。集謂古今賢良所抄。如御覽之流。王_音晳_音夜云。逍遙者。調暢逸豫之意。夫至理內足。無時不適。亡懷應物。何往不通。以斯而遊天下。故曰逍遙。又云。理無幽隱。道然而當。形無巨細。適然俱適。故曰逍遙。李仲卿著十異九迷。以斥佛法。南山作十喻九箴。用形邪說。今略其五。一曰。老君逆。

常託牧女而早出世尊順化。因聖母而誕生。二曰老聃有生有滅。畏患生之生。反指白首。釋迦垂迹。示生示滅。歸寂滅之滅。乃耀金軀。三曰重耳誕形。居陳州之苦縣。能仁降迹。出東夏之神州。四曰伯陽職處小臣。忝充藏吏。不在文王之日。亦非隆周之師。牟尼位居太子。身證特尊。當昭王之盛年。爲閭浮之教主。五曰李氏三隱三顯。無教可依。假令五百許年。猶慙龜鶴之壽。法王一生一滅。示現微塵之容。八十年間。開演恆沙之衆。凡諸比決。其事實多。具如甄正。辨正。笑道。心鏡。破邪。二教。牟子等論。齊物云。秋毫不小。泰山不大。月末爲晦。晦暗也。月初爲朔。朔。蘇也。十五日曰望。謂十五日日月相望。卽滿月也。故說文云。月者亦名望舒。月望則舒。始自弓娥。終十四夜。以月初出如似娥眉。復如弓滿。故說文云。月者亦名恆娥。亦名常娥。月初月末。恆常如娥。

第四之一

陶切者。今濮州南陶丘城。堯曾居之。故曰堯城。故謂堯曰陶唐氏。臣軌云。夫孝者。先須安國。國安所以家安。家安所以行孝。律者。陶虞始造。蕭何以爲九章。爾雅云。法也。

第四之二

振丹兩字。並恐書誤。下第十所引卽云震旦。琳法師釋云。東方屬震。是日出之方。故云震旦。新婆沙云。脂那西域記云。至那。此聲並與震旦。眞丹相近。

第四之三

國語云。管仲相齊。制三十家爲邑。尙書大傳云。凡宗廟有先王之主曰都。無曰邑。說文曰。造。就也。聘。問也。釋名曰。州者注也。郡國注仰也。風俗通云。州者疇也。疇類也。說文云。田界也。孝傳云。三州人者。契爲父子。長者爲父。次爲長子。次爲幼弟。父令填河以造宅。久填不滿。爲父所責。二子發誓。若必孝誠。使填河有徵。發是誓已。河爲之滿。又蕭廣濟孝子傳云。昔三人各一州。皆孤露惻獨。三人暗會於一樹下。相問。甯爲斷金之契。二人曰善。乃相約爲父子。梁朝破。三人離。釋名云。人所羣聚曰郡。天子制地千里。分爲百郡。蕭廣濟孝子傳云。昔五郡人。謂中山郡。常山郡。恆州。魏郡。魏州。鉅鹿郡。邢州。趙郡。趙州。此五人者。少去鄉里。孤無父母。相隨至衛國。結爲兄弟。長字元重。次仲重。次叔重。次季重。次雉重。朝夕相事。財累三千。於空城中見一老母。兄弟議曰。拜此老母。以之爲母。因拜曰。願爲母。母乃許焉。事之若親。經二十四年。母忽染患。口不能言。五子仰天而歎曰。如何孝誠無感。母忽染患而不能言。若我有感。使母得語。應時能言。謂五子曰。我本是太原陽猛之女。嫁同郡張文堅。文堅身死。我有兒名烏遺。七歲值亂。遂亡所之。我子胸前有七星之文。右足下有黑子。語未竟而卒。五子送喪。會朝歌令晨出。忘其記囊。謂五子所竊。收三重禁。二重詣河內告枉。其書始末。河內太守乃是烏遺。因大哭曰。吾生不識父母。而母爲他所養。馳使放三重。後奏五人爲五縣令。毛詩刺齊云。有挈壺氏。知漏刻之官。漏刻不節。君臣服亂。而倒裳求領。禮度昏亂。周禮云。卜以決疑。不疑何卜。釋名云。書。庶也。紀庶物也。書亦曰著。著萬物。故周禮有六書。謂指事。象形。形聲。會意。轉注。假借。劉子云。龜以智自害。翠以羽自殘。丹以含色磨肌。石以抱玉碎質。莊子云。燕

支離肩高於頂。頤隱於臍。五管在上。若賜疾者粟。我則有分。若差役者兵。我則無用。是名全生之大用。莊子曰。有力者負而趨之。而昧者不覺。呂氏春秋曰。勞者精神則散也。詩曰。在心爲志。爾雅云。金謂之鑠。木謂之刻。骨謂之切。象謂之磋。玉謂之琢。石謂之磨。又釋訓云。如切如磋。道學也。人須學以成德。如琢如磨。自修也。人須修以立行。眸子童子也。孟子云。心中正則眸子明。翠者翡翠也。異物志云。巢於高樹。離地六七丈。夷人下之取其子。說文云。赤雀形大如鵞。翅羽碧色。耽者爾雅云。久樂也。宗尊也。廟貌也。謂尊貌之所居。社謂后土。土者吐也。土之所生。如口吐物。卽地神也。國語云。平九土。故祀以爲神。田正也。又云。戴黃天而履后土。土地廣。不可盡敬。故封爲社。稷爲五穀總名。卽五穀之神也。故天子所居左宗廟。右社稷。布列四時五行。褒姒者。昔夏后氏之衰。有二龍止於夏庭。自言余褒姒之二先君也。龍亡而蔡在。櫜而韞之。夏亡。以此器傳於殷。殷亡。又傳於周。三代莫之敢發。至于幽王末年發之。蔡流于庭。使婦人裸而噪之。化爲元龍。入王後宮。後宮有未甞童女遭之。旣笄而孕。無夫而生。懼而棄之於路。有夫婦夜聞其啼。哀而收之。遂亡奔於褒國。褒人贖罪。請入童女於幽王。女出褒國。故云褒姒。幽王三年。於後宮見而愛之。生子伯服。乃廢申后及太子。立褒姒與伯服。姒不好笑。笑則百二十媚。幽王欲其笑。打賊鼓。舉烽火。諸侯悉至而無寇。姒乃大笑。幽王數爲之。諸侯後遂不至。至十一年。申侯與犬戎共攻幽王。幽王舉烽火。打賊鼓。徵兵莫至。遂殺幽王。虜褒姒。盡取周賂而去。申侯乃與諸侯立太子。詩傳云。非穀而食曰肴。肴。菹也。說文從肉者啖也。肥腴者。說文云。腹下肉也。莊曰。五色亂目。使目不明。五聲亂耳。

使耳不聰。五臭亂鼻。因悛中顙。五味噁口。使口腐爽。取舍滑心。使性飛揚。此五生害。害於五根。老語大同。第四之四

猶者。爾雅云。如麝。善登木。尸子言五尺大夫曰。猶。說文云。隴右謂犬子爲猶。亦獾屬。孔丘云。兵食尙可去。信不可去。尚書云。土無由曰壤。郭注爾雅云。勞苦多墮曰窳。博物志云。皇甫謐問青牛士說養生法云。人欲常勞。食欲常少。勞無過極。少不至虛。去肥膩。節鹹酸。

第五之一

文選甘泉賦云。覽道德之精剛。剛卽金石中堅也。陣。陳也。謂布列也。太公六韜中有天地人雲鳥等陣也。後漢靈帝崩。後獻帝時有牟子深信佛宗。譏斥莊老。著論三卷三十七篇。第二十一救沙門譚是非。中立問云。老子曰。知者不言。言者不知。又云。大辯若訥。又曰。君子恥言過行。設沙門知至道。何不坐而行之。空譚是非。虛論曲直。豈非德行之賊耶。答。老亦有言。如其不言。吾何述焉。知而不言。不可也。不知不言。愚人也。能言不能行。國之師也。能行不能言。國之用也。能行能言。國之寶也。牟子又云。懷金不現。人誰知其內有瑋寶。披紬不出戶。孰知其內有文彩。馬伏櫪而不食。則驚與良同。羣士含音而不譚。則愚與智不分。今之俗士。智無髣倂。而欲不言辭。不說一夫。而自若大辯。若斯之徒。坐而得道者。如無目欲視。無耳欲聽。豈不難乎。春秋中齊威王二十四年。魏王問齊王曰。王之有寶乎。答無。魏王曰。寡人國雖爾。乃有徑寸之珠十枚。照車前後各十二乘。何以萬乘之國而無寶乎。威王曰。寡人之謂寶。與王寶異。有臣如檀